

Politeknik tingkatkan mutu pengajian

Oleh Rosniza Mohd Taha
yoniza@mediaprima.com.my

■ Putrajaya

Jabatan Pengajian Politeknik (JPP) memeterai kerjasama dengan tiga institusi pengajian tinggi (IPT) bagi meningkatkan kualiti program pengajian dan penyelidikan serta penyediaan latihan industri.

Memorandum persefahaman (MoU) ditandatangani dengan UCSI University (UCSI), Kolej Sunway Kuching dan EC Council Academy Sdn Bhd (EC Council Academy).

Majlis menandatangani ketiga-tiga MoU itu diadakan bersempena dengan Majlis Pelancaran Transformasi Politeknik Fasa Dua & Pelancaran Lunak FIRA Roboworld Cup & Kongres di sini, baru-baru ini.

JPP diwakili bekas Pengarahnya, Mohd Nor Yusof sementara IPT terbabit diwakili barisan pengurusan kanannya. Yang hadir sama ialah Menteri Pengajian Tinggi, Datuk Seri Mohamed Khaled Nordin dan Ketua Setiausaha Kementerian Pengajian Tinggi, Datuk Ab Rahim Md Noor.

Kerjasama dengan

3 agensi

Kerjasama dengan UCSI membabitkan pembangunan program dan akademik, jaminan kualiti dalam program terpilih, pertukaran tenaga pengajar dan pelajar serta penyelidikan dan pembangunan terutama dalam kursus permainan komputer.

JPP juga akan bekerjasama dengan EC Council Academy bagi pembangunan Pusat Teknologi bidang Keselamatan Teknologi Maklumat (IT) sebagai pusat latihan bertauliah bagi menjana sumber kepakaran dan tenaga kerja sebagai memenuhi keperluan industri itu.

EC Council Academy dipilih bagi menjalin kerjasama berikutan kepakaran sebagai penyedia latihan bidang IT serta wakil rantau Asia Pasifik bagi International Council of Electronic Commerce Consultants.

Kemahiran tambahan

Kerjasama itu juga membolehkan pensyarah dan pelajar politeknik mendapat

kemahiran dan pengalaman terkini bidang IT bagi menjayakan pembangunan program baharu Keselamatan IT peringkat diploma.

Sementara itu, kerjasama dengan Kolej Sunway Kuching adalah usaha strategik politeknik bagi memastikan pelajar program perakaunan di Politeknik Kuching Sarawak mendapat pensijilan Certified Accounting Technician.

Dalam usaha memudahkan pelajar mendapat pensijilan profesional itu, Kolej Sunway Kuching mengadakan taklimat kerjaya yang dikendalikan wakil industri dan menawarkan insentif pengecualian bayaran bernilai RM8,500 bagi empat kertas, pengecualian bayaran pendaftaran RM210 serta diskaun tiga peratus bagi yuran tuisyen kepada enam pelajar Diploma Perakaunan.

Politeknik Kuching Sarawak juga berhasrat mengembangkan kerjasama itu meliputi pelaksanaan aktiviti Business Games yang akan memberi pengalaman sebenar kepada pelajar.



Mohamed Khaled (dua dari kanan) menyaksikan pertukaran dokumen antara Ab Rahim (dua dari kiri) dengan Timbalan Naib Canselor UCSI, Profesor Emeritus Dr Lim Koon Ong. -